

# Ich denk oft an Alt-Otterberg

Ich denk oft an Alt-Otterberg,  
fong o se simmeliere.  
Meu Kindheit un meu Jugendzeit  
duhn donn vebeispaziere.

Ich sieh vor mer donn die alt Kerch,  
die Mauere, die dicke,  
die Fachwerkhaiser drumerum,  
wo dicht zusommericke,

es Railche mit de Sondstäätrepp,  
die Gass mit Plaschderwagge,  
die Siedlunghaiser, newedroo  
die alte Wohnbaragge,

de Weiherdomm, die Hinnergass,  
de Wasem un die Badstubb  
un's Krause Loch, wo mondags als  
geroch hot frisch Worschtsupp,

de Baadweiher m'em Briggelche,  
de Schlossbersch mit de Keschde;  
im Herbschd honn mer se selbsch geleees.  
So schmecken die om beschde!

Die Ringelo vum Wingertsbersch  
war'n immer sieß un knaggisch,  
die Frihäppel vum Longebusch  
eher sauer un gonz plaggisch.

Ich denk als on die Lehmekaut,  
do bin ich uff die Welt kumm  
un unne on de Eselsbach  
gekrawwelt uff de Bääm rum,

on's Stromere om Gääsebersch,  
on's Drachesteie losse,  
on's Klettere im Stääbruch drauß  
un meu verriss'ne Hosse,  
on's Rodele om Rotebersch,



on's Bolze in de Gasse,  
on's Kersche stränze un debei  
on's 'Uff-de-Schitz-uffbasse'.

Die Milch hot's noch beim Bauer gäbb,  
owens im Millichkännche  
un Gutsjer, Waffle, Kaugummi  
om Marktplatz om klää Stännche.

War dorschdisch mol die Kinnerkehl  
vum Doowe un vum Renne,  
hott unne mer im Lochbrunne  
frisch Wasser trinke känne.

Wollt als die Stadt mol ab un zu  
Wasser un Strom abstelle,  
do muscht de Jakob uff de Gass  
die Neiichkäät ausschelle.

Om Eck hot er die Schell geschwung,  
die Nachricht unner's Volk gebrung:  
'Es werd bekonntgäbb, Leit, honn acht:  
de Strom fällt aus bis Uhre acht!'

Mei erschter Kuss hat's domols gäb  
wo's uff de Bersch geht, uff de Trepp.  
Was hat des Herz do wild gebummt  
und in de Ohre hat's gesummt!

Des sinn so Sache, wo ich heit  
noch wääß aus meuner Kinnerzeit.  
Die war so schää un sorjefrei,  
doch leider viel zu schnell vebei.

Erinnerung bleibt iwwerisch:  
Alt-Otterberg, wie miss ich Dich!